



PEJABAT KETUA PENGARAH PENDIDIKAN MALAYSIA
Office of the Director General of Education Malaysia
PARAS 7 BLOK J PUSAT BANDAR DAMANSARA
Level 7 Block J Damansara Town Centre
50604 KUALA LUMPUR

Tel: 03-2586900
Fax: 03-2535150

KP (BS) 8591/Jld.XVI (20)
16 Disember 2000

Semua Pengarah Pendidikan Negeri

Y.Bhg. Dato'/Tuan/Puan,

SURAT PEKELILING IKHTISAS BIL. 20/2000:
Panduan Penubuhan Persatuan Agama Bukan Islam Di Sekolah-Sekolah

Kementerian Pendidikan mendapat maklum bahawa telah timbul beberapa kekeliruan mengenai dasar dalam penubuhan Persatuan Agama Bukan Islam di sekolah-sekolah. Untuk makluman Y.Bhg. Dato'/Tuan/Puan, dalam **Peraturan 4, PERATURAN-PERATURAN PENDIDIKAN (PERSATUAN SEKOLAH) 1998**, Seksyen 130 AKTA PENDIDIKAN 1996 yang berkuatkuasa pada 21 Mei 1998, ada dinyatakan mengenai Penubuhan Persatuan Sekolah, di mana *Guru Besar atau Pengetua, setelah menerima permohonan secara bertulis, hendaklah menubuh persatuan sekolah daripada kategori yang berikut.*

- (a) *mata pelajaran yang diajar di sekolah sebagaimana yang dinyatakan dalam PERATURAN-PERATURAN PENDIDIKAN (KURIKULUM KEBANGSAAN) 1997;*
- (b) *hobi dan rekreasi;*
- (c) *sukan dan permainan;*
- (d) *badan beruniform; dan*
- (e) *apa-apa persatuan lain yang diluluskan oleh Pendaftar.*

2. Jelas dalam **Peraturan 4** bahawa Persatuan Bukan Agama Islam tidak termasuk dalam kategori (a), (b), (c) atau (d). Walau bagaimanapun, **kategori (e) memberi kuasa khas kepada Pendaftar**, iaitu Pengarah Pendidikan Negeri, untuk meluluskan apa-apa persatuan lain sebagai persatuan yang berdaftar di sekolah. Dalam kata lain persatuan bukan agama Islam boleh ditubuhkan di sekolah-Sekolah setelah Pendaftar membuat pertimbangan dan berpuas hati dengan permohonan yang diterimanya secara bertulis.

3. Perlu ditegaskan bahawa pendirian Kementerian Pendidikan dalam isu penubuhan Persatuan Agama Bukan Islam di sekolah-sekolah adalah kekal, iaitu seperti yang diamalkan sekarang (**status quo**). Pendirian ini bermaksud:

- (a) Mana-mana sekolah yang sudah ada Kelab Agama Bukan Islam, maka kelab tersebut bolehlah diteruskan;
- (b) Sekiranya ada permohonan baru di kalangan murid atau guru untuk menubuhkan kelab-kelab bukan agama Islam, maka ia hendaklah mengikuti **PERATURAN-PERATURAN PENDIDIKAN (PERSATUAN SEKOLAH) 1998**; dan

(c) Sekiranya ingin mengadakan aktiviti-aktiviti yang melibatkan penyertaan orang luar bagi membantu dalam melaksanakan aktiviti-aktivitinya, maka hendaklah juga mematuhi segala arahan dan peraturan yang sedang berkuatkuasa.

4. Apabila diluluskan penubuhannya oleh Pendaftar, maka Persatuan Agama Bukan Islam seperti ini hendaklah mengambil kira perkara-perkara berikut:

- (a) Aktiviti-aktiviti kelab hendaklah dirancang dan dilaksanakan dengan mengambil kira sensitiviti kebebasan beragama dan juga hakikat bahawa Islam adalah agama rasmi negara;
- (b) tidak boleh menjalankan sebarang usaha atau aktiviti yang bertujuan untuk mempengaruhi dan mengembangkan kepercayaan atau anutan kepada murid-murid dari agama lain;
- (c) keahlian sesuatu persatuan bukan agama Islam hanya untuk murid-murid yang menganuti agama itu sahaja dan tidak boleh diperluaskan kepada penganut agama lain;
- (d) tidak ada apa juga bentuk paksaan kepada mana-mana murid untuk menganggotai kelab tersebut;
- (e) tidak ada unsur paksaan kepada mana-mana murid untuk mengikuti aktiviti-aktiviti kelab tersebut;
- (f) Guru Penasihat hendaklah dilantik sendiri oleh Guru Besar atau Pengetua; dan
- (g) Sebarang penglibatan pihak luar hendaklah terlebih dahulu mendapat kebenaran daripada Pendaftar.

5. Walau bagaimanapun, adalah diingatkan bahawa Pendaftar, dalam **Peraturan 12(1)** PERATURAN-PERATURAN PENDIDIKAN (PERSATUAN SEKOLAH) 1998, *boleh secara bertulis, mengarah mana-mana persatuan sekolah dibubarkan jika berpuas hati bahawa persatuan itu mungkin digunakan bagi maksud:*

- (a) *yang tidak memberi manfaat kepada murid dan guru;*
- (b) *propaganda politik yang memudaratkan kepentingan Malaysia atau awam;*
- (c) *yang memudaratkan kepentingan murid; atau*
- (d) *yang melanggar mana-mana peruntukan Peraturan-Peraturan ini.*

6. Adalah diharapkan supaya Y.Bhg. Dato'/Tuan/Puan mengambil tindakan segera dengan memaklumkan kepada semua pegawai peringkat pentadbiran di Jabatan Pendidikan Negeri, Pejabat Pendidikan Bahagian/Daerah dan sekolah mengenai perkara ini.

Sekian. Terima kasih.

"BERKHIDMAT UNTUK NEGARA"



DATO SERI DR. ABUDL SHUKOR ABDULLAH
Ketua Pengarah Pendidikan Malaysia

- s.k. 1. Y.B. Tan Sri Dato' Musa Bin Mohamad
Menteri Pendidikan Malaysia
- 2. Y.B. Dato' Abdul Aziz Bin Shamsuddin
Timbalan Menteri Pendidikan
- 3. Y.B. Dato' Hon Choon Kim
Timbalan Menteri Pendidikan
- 4. Y.B. Dato' Mahadzir Bin Mohd Khir
Setiausaha Parlimen Kementerian Pendidikan
- 5. Ketua Setiausaha Kementerian Pendidikan
- 6. Timbalan-Timbalan Ketua Setiausaha Kementerian Pendidikan
- 7. Timbalan-Timbalan Ketua Pengarah Pendidikan
- 8. Ketua-Ketua Bahagian Kementerian Pendidikan
- 9. Ketua Nazir Sekolah
- 10. Pegawai Perhubungan Awam